


Simposie de scultura Toni Gross

La 4° edizione de l'event sarà a Poza dai 10 ai 15 de setember e l'arà desche argument i Mondiei junior de schi alpin 2019



Scultures de Toni Gross, sul placat del simposie.

Èrt - "Gregn evenc e mont: zipièr i Mondiei junior de schi alpin 2019": l'é chest l tem de la 4^a edizion del simposie dedicà a Toni Gross. Da en lunesc ai 10 enfin en sabeda ai 15 de setember, chest tem vegnarà interpretà da 12 artisè che farà doventèr l paìsc de Poza, tel Comun de Sèn Jan, n gran laboratorie de scultura a l'averta, luran per 5 dis

tel zenter e enlongia la strèda de Meida per realisèr sia opera da na bora o n tulin de zirm.

L simposio internazionèl de scultura tel legn en recort de Toni Gross vegn endrezà dal 2012, vegni doi egn, sun temes leé a chel generèl de "L'om e la Dolomites".

L'obietif, apede che ben segur chel de recordèr la fegura del zipiadòr

e alpinist de Poza, stat ence insegnant e diretor de l'Istitut d'Èrt ades Liceo artistich, l'é chel de ge perferir a la jent de la val e a sie ghesé, te n temp olache la sajón da d'istà taca a se serèr sù e per la scola scomenza n nef an scolastich, n event che mete adun la proposta turistica co la promozion di valores del teritorie: l mont, la cultura e l lengaz de la popolazion ladina e la valorisazion de l'èrt e de la scultura, vocazion storica te Fascia, olache da beleche 80 egn l'é na Scola d'èrt.

L'event é endrezà da la Scola Ladina de Fascia - Liceo artistich/ Scola de èrt G. Soraperra, ensema con l'Union di Ladins de Fascia, l Comun de Sèn Jan e l'Istitut Cultural Ladin "Majon de fascegn" e l'é sostegnù da la Region Trentin Sudtirol, da l'Azienda de Promozion Turistica de Fascia, dal Consorzio Elettrich de Poza, da la Frazions de Poza e Pera e da etres sponsor privac.

La quarta edizion se joa amò apede de la colaborazion con l Comitad Organisador di Campionac Mondiei junior Schi Alpin Trentin - Fascia 2019, per meter a l'atenzion di artisè e di vijiadores l'event sportif emportant che vegnarà endrezà te val tel meis de firé de l'an che vegn.

En sabeda ai 15 de setember la operes sarà valutèdes da na juria tecnica de artisè e esperc, con a cef l'architet Gianni Pettena, che dezidarà i venjidores del prum, secont e terz pest. Tel medemo di ence l publich podarà votèr l'opera che ge sà più bela. Da sera sarà la premiazion, con intervenc de enteress culturèl e cornisc de musega.

Per tor ite de più i joegn de la Scola de Fascia, ti dis del simposie sarà ativà ence n laboratorie didatich che ge permetarà a n grop de studenc di ultimes egn, co la guida preziosa di dozenc del Liceo artistich, de fèr n'esperienza de scultura dedant al publich e apede ai artisè più esperc. Amò apede ti medemi dis se podarà veder en esposizion la operes realisèdes dai artisè che tol pèrt al simposie.



Carlo Abbà, venjidor de l'ultima edizion del 2016.